

池州府志卷第五十六

中憲大夫知江南池州府事加六級襲平馬世永編纂

名宦傳三

漢陵陽子明孝武帝時爲陵陽令清談終日縣務自理以仙去語在方外傳中

吳黃蓋字公覆零陵泉陵人初爲郡吏察孝廉辟公府孫堅舉義兵蓋從之拜別部司馬堅薨隨策及權諸山越不賓有寇難之縣輒用蓋爲守長石城縣吏特難檢御蓋乃署兩掾分主諸曹教曰令長不德徒以武功爲官不以文吏爲稱今賊寇未平有軍旅之務一以文書

委付兩掾當檢攝諸曹糾擿謬誤兩署所署事入諾出
若有姦欺終不加以鞭杖宜各盡心無為衆先初皆怖
威夙夜恭職久之吏以蓋不視文書漸容人事蓋亦嫌
外懈怠時有所省各得兩掾不奉法數事乃悉請諸掾
吏賜酒食因出事詰問兩掾辭屈皆叩頭謝罪蓋曰前
已相勅終不以鞭杖相加非相欺也遂殺之縣中震慄
後轉春穀長尋陽令凡守九縣所在平定遷丹陽都尉

山越懷附

三國志
全文

唐韋仲堪字權輿天寶間青陽令為政豈弟而民從之
與李白九華山聯句

劉秋浦失名元和初秋浦令也語在方外傳

陳蟠叟咸通八年至德令時懿宗以政委宰相路巖巖
又委親吏邊咸縱為不法蟠叟奏書請間言財利帝召
見則曰臣願破邊咸家可佐軍興帝問咸何人對曰宰
相巖親吏也帝怒立竄愛州後巖終坐咸流死

南唐吳仲舉興國人後主時為池陽令

按史稱池陽令
乃池陽之令也

破池州執仲舉仲舉曰世祿李氏國亡而死職也彬義
而舍之子中復入宋知池州

宋夏中正貴池人開寶中知貴池縣語在本傳

蔣之奇字穎叔

人嘉祐四年知青陽縣有龜山崇

壽寺題字及齊山寄隱巖亦有之奇與程正轉題名增

梅堯臣字聖俞宣城人素工詩第進士景祐中知建德

縣有惠政而於山水遊歷處輒多題咏今集中所存池

州後詩是也累官國子監直講尚書都官員外郎邑人

思慕遺澤至今有梅公祠

沈播錢塘人天聖二年第進士初為楚州司法參軍再

調為貴池縣主簿適令不能其官播佐之縣以大治嘗

攝銅陵縣事縣人有兄弟爭財者播為辨其曲直而卒

使之感寤相與讓財同居及去兩縣人追送涕泣遠焉

後去

見王安石集

汪奕字公偉績溪人哲宗初第進士嘗知東流縣有書

生上書觸時忌憲使欲置之極刑奕以為狂疾宜寬其

罪奏上果貸死憲使謝奕曰微君吾幾陷失入矣

見新安文

獻志與舊志稍異

茅革字孚道全椒人治經術能文第進士為真州楊子

縣王簿熙寧間擢知貴池縣精于吏事所至令行禁止

有田者革為流涕諭以同生當盡恩義兄弟感

泣而去

楊元秉紹興三十一年知青陽縣每事精覈羣吏縮手

莫敢舞文即臺省亦難屈以私縣學舊在治之西元秉
爲遷于治東南縣人宜之仕至奉議大夫祀名宦

陳昇卿乾道二年知青陽縣縣有南唐宋齊丘私增賦
額相沿未除昇卿請核減之濟國虞公上其事由是獲
蠲貸擢侍御史民至今祠之

林桷字子長玉山人淳熙七年知銅陵縣政尚寬簡晝
日垂簾庭無訟者以最增秩至今祠之

許介高陽人淳熙十一年由繁昌尉擢知青陽縣有惠
政嘗建邑東一橋曰高陽又建九華神一祠曰協濟後
介仕至安撫使歿于官舟載其櫬過大通忽有風自江

心送其舟至高陽橋下止焉青民於是建祠於橋右祀
之名之曰安撫相公祠云

蔡汝揆奉議郎知貴池縣廉謹精勤盡心舉荒政真德

秀薦之遷通判筠州軍事

見真西山集

潘錫字叔剛長樂人慶元四年知銅陵縣興學校勸農
桑每廉豪強者置之法而儉于自奉民從其化焉

趙方字彥直衡山人淳熙八年第進士慶元五年知青
陽縣甚愛民時知池州者爲史彌遠行事每不相合嘗
語之曰催科不擾是催科中撫字刑罰無差是刑罰中
教化雖與彌遠左而人皆服以爲名論也仕至荆湖制

置使

張孝章開禧間知銅陵縣善爲治能舉廢墜建山川諸壇以奉神祀并築風沂富覽各亭供眺覽備壯觀焉許谿嘉定七年知青陽縣材力強濟能于其官時池諸邑皆因宣限困於預借谿始至適逢儉歲朝夕勤瘁如理其家使民間既償舊逋又免新借邑之瘡痍于是一

洗焉

見真西山集

吳淵字道父宣城人嘉定七年第進士除建德縣主簿改建學宮於縣西北隅由是邑興文教後淵歷官至參知政事卒建人遂即學宮祀之所著有易解退菴集

夢規知建德縣改築梅公亭於縣圃之北志稱其潔

心愛民卓有政績云

胡次焱字濟鼎婺源人登進士第授湖口縣主簿以道遠不便養親改授貴池縣尉錄五縣囚人稱平允有鬼愬毆死者獲伸于次焱焉德祐元年元伯顏兵薄池州統制張林已納款次焱託公事赴東流詐立木表于道旁書曰貴池縣尉死葬此下遂脫歸以易教授以歿

安文獻志

元陳伯奎天台人至元初爲銅陵尹建學校表先賢由是銅士知嚮學祠名宦

方濬至元間銅陵尹能撫民興學造士重建太白祠于五松山祀名宦

史午至元二十九年青陽尹多善政喜旌表節義以勵風俗風俗爲之一變焉有九華山詩祀名宦

忻都蒙古人大德四年監石埭縣事首革金弊放場分定權衡以平市交易民便之舊制歲輸秋苗二萬八千石于本路皆本邑轉輸山阪所費不貲都請改折色名輕贖由是著爲定令民免轉輸立宣化碑以頌其德又嘗禱雨雨立澍嘗度學宮前隙地築一臺榜曰潔已士大夫輒作歌詩以咏其事

士元字弘道延祐二年第進士由鄞縣丞遷貴池尹不求赫赫名而樂易可近嘗平反一殺人獄亦不自以爲功也由是吏弗忍欺而民愛之部使者考績以最聞遷同知鉛山州事而士元已卒後尹代之者即其持江

浙文衡時所進士也

見黃文獻公集

徐泰亨字和甫至順二年授承事郎青陽縣尹青陽舊有荒田千四百頃民均輸其租泰亨募人墾闢教以修坊置閭於是田賦歸實無均輸之累至它民田之阻山瀕江者俾因地勢爲蓄泄以備旱潦歲饑則蠲已俸倡衆賑之時有告四十人同發其廩粟者吏欲准強盜論

泰亨曰吾不忍其發粟求生而抵重禁悉笞而遣之鄰縣銅陵人爭魚池三十年不決就讞于泰亨泰亨以數語決之人于是無不感服會欲廣學宮有方某為之割地欲建惠民局有章某為之捐地焉以秩滿去舊志僅列其官為徐承事云

見黃文獻公集

汪維祺字壽甫歙人文宗時為青陽縣尹公勤涖事邑多盜為下令諭有犯者稍給資本令治生盜由是息歲饑民大疫維祺未及請先發廩賑之并召醫診疫者存活甚眾有張氏兄欲奪其亡弟資而誣其婦有姦狀又邏者捕盜而贓不符其主數二者獄皆具維祺疑其冤持之既訪得實並雪之以親老致仕送者鳴號數十里

新安文獻志

查敬友浮梁人至治元年為建德主簿甚愛民民以事實聞天曆元年考最即擢本縣尹卒官遂家于建

吳師道字正傳蘭溪人幼讀真西山集深有得於為己之學至治元年第進士為寧國路錄事至元三年遷建德尹明達寬簡不事鞭朴吏自不敢欺本路有學田七百畝在建為豪右所占久矣總管下其事師道按籍察歸學建舊稅茶稅特重師道以病民陳請得減稅縣人德之中書右丞呂思誠侍御史孔思立薦為國子博士

池州府志卷五十一
歷奉議大夫禮部郎中所著有易詩書雜說胡傳附辨
國策校注敬鄉錄及文集二十卷

袁雋字孟敏富川人由茂才入仕至正中五轉而爲青
陽尹精強端敏熟知民疾苦於獄訟不數言折之豪右
無敢入縣門者月吉謁孔子廟退講經義使民觀聽俾
知立身行己之道紅巾賊起江淮間所過無完邑將次
及青雋委家野處令民爲保伍察有無良應賊者即誅
之及賊至率民迎戰以是賊不能爲害青民德之樹碑
紀功績余忠宣公爲之記存縣志中

王晉卿武昌人第進士至正七年爲建德尹有政譽民
祠之於學

上官凝邵武人元末爲銅陵尉以清節著秩滿去有十
數叟送之餽藥數器至前路發視之皆白金也追召其
人語之曰吾於前事奉法循理非私汝也詎義始而以
私終乎卒不受

明張文昱字克敏句容人吳元年爲青陽知縣建廳廡
興學校有勸民之政

時守道吳元年爲銅陵知縣勸建學宮并設義學延名
師集民間俊秀教之祀名宦

姜士原洪武三年爲貴池知縣有廉幹撫民有方

夏霖字民悅洪武初爲建德知縣時方兵燹後學宮盡燬霖即宋學舊址勅建焉它政事俱忠而能力監察御史劉天錫廉其實爲名其堂曰忠勤并記之

祝文貴洪武初爲東流縣丞于縣治東勅建儒學興文造士自其始之東士甚賴焉

胡琰 昌人洪武三年任石埭典史持已正直御下無私陞興國州知州

尹安茶陵人洪武四年進士五年任石埭知縣時方兵燹後民皆流散失業安爲勞來安集且興學以教之值旱禱於陵陽山雨立沛乃築望仙亭以祀子明自爲之

記埭人德之祀名宦

王仕廉興平人洪武七年任銅陵知縣時學宮新建規制多未備仕廉爲立櫺星門東西兩廡及射圃善戢盜境內帖然民安其業遷安慶府通判去

王理盧龍人洪武二十一年以監察御史改建德知縣廉而善斷賞罰較如數年中百廢具舉吏不敢欺民德之

孟常鄱陽人洪武中任石埭知縣善撫字民無逋賦以才調建德時建多逋賦累歲不得償常至爲設法悉楚之賦法仍元舊有不得其當者常請改定其制於是建

得減稅以萬計秩滿應遷民赴闕乞留二邑俱祀名宦
呂復衛輝人洪武末以國學生授東流典史能勤其事
善於字民擢工部郎中歿祀名宦

鄧羽南海人

舊志誤
南陽

有文名工導引之術洪武末任青

陽知縣能舉其職永樂初忽挂冠去不知其所之或曰
入武當山爲道士

翟溥福字本德東莞人進士永樂四年任青陽知縣善
撫字民不苟於其職擢南康知府

李籓魚臺人永樂初爲銅陵典史以廉幹聞遷繁昌知
縣歷德安知府銅陵祀名宦

黃金蘭永豐人永樂中任貴池典史理繁劇有能聞才
洪熙元年考績最擢貴池知縣洞悉民間利病爲次第
興除之民親之如父母前後凡十八年卒其子即家于
池焉

商賓洛陽人永樂末爲兵科給事中洪熙元年謫銅陵
知縣銅有荒田不爲民業者賓請聽民墾闢既熟而後
賦之獲允銅自此增額田以數千計秩滿應遷去銅民
赴闕請留爲加品俸仍知縣事宣德七年倡邑人余志
貴等大建學宮歷三考皆以最聞祀名宦

吳禎進賢人進士宣德七年任建德知縣廉而明仁而

恕不督責而民自化之

阮士進字志學浙建德人永樂中舉人授羽林前衛經

歷正統四年遷貴池知縣律已甚嚴而御下以寬均徭

省賦興學勸農甚得民譽以母老乞歸

見嚴州府志

楊貢樂安人進士正統六年任石埭知縣六事畢舉擢

監察御史歷蘇州知府

吳貞字乾定龍谿人正統十一年任貴池知縣性嚴正

而長於才臨事安詳無一毫急遽狀民德之遷通判去

李祐仁和人正統十二年任建德知縣洞達治體果斷

有為羣吏訾服不敢上下其手民德之

余白圭天順間以儒士任貴池知縣優于經術莅治卓

然有聲遷泰州知州去

田本天順間以御史謫貴池知縣有廉幹勤於其職未

幾召還

郭誠興濟人天順間任貴池知縣每事持正而敏練有

餘案無留牘遷府同知致仕

劉獻濟寧人成化元年任貴池縣丞素廉介有訟立為

剖斷之邑多曠土而民率多游手不務農業者獻每教

之植桑麻為園圃至今賴之

洪達淳安人成化四年任青陽知縣重建縣廳事以勞

稱而字民有惠政及歸攀送者塞道

李華泰寧人國學生成化五年任建德知縣以慈惠稱而聽斷明決民皆畏服之

陳鏐慈谿人舉人成化六年任銅陵知縣輕徭減稅戶口日增而興文造士學校尤賴之

徐旻永康人國學生成化六年任石埭知縣省刑薄稅以字其民重建文廟殿庭及東西廡歷九年民間夜戶不閉後令蕭環為建忠良祠祀之

鍾秀黃梅人舉人成化十四年任石埭知縣性愛民每

邑中節冗費廳事後向未建川堂秀舉之而出已膏不煩民役民至今稱之

王政字布德易州人太學生成化十六年任青陽知縣剛果而廉明值歲饑為設法徧賑四鄉多盜為嚴緝捕

民賴以安既乃大葺學校初伐石為櫺星門製祭器購書籍貯學中邑東五阡圩多水溢為建橋三座以濟行

者遷廣德州知州

周源同安人進士成化十七年任石埭知縣廉而能惠值歲灾能徧恤其民無流亡者縣署及各行臺多所建

立民思之祀名宦

周宗裕州人進士成化十七年任貴池知縣性寬厚自

甘淡薄而民化之擢監察御史

蕭環字道循安福人舉人成化二十年任石埭知縣性慈祥善撫字兩值旱度縣南洪口築陂一區長三里許濬舊溝道俾入陂蓄水以資灌溉民賴之號其陂曰蕭侯陂又大葺學宮添造舖舍別築橋六治路二邑中煥然改觀焉時山適多虎環爲文告于神次日虎皆遠去有自殪者遠近盡詫以爲異云

宗彛隨州人進士成化二十二年任建德知縣素嚴重有威而清苦自厲六年如一日擢監察御史

楊李方番禺人進士成化二十二年除東流知縣單車至官廉豪強者置諸法民皆畏服值歲饑旣徧賑又察鬻子女者官爲贖還之祀名宦

劉潔臨漳人弘治元年任貴池知縣勤于撫字暇日即躬履邨莊勸課農作民亦親之

蕭佩新淦人舉人弘治六年任東流知縣有政聲以學宮在縣東不利遷建于縣治東北又築城南一堤插柳以蔭行者人思之號之爲蕭公堤云

向錦慈溪人進士弘治十三年任東流知縣政尚平易庭可張羅去後民追思之祀名宦

錢瓚鄆縣人進士弘治十五年任青陽知縣行旌善懲

惡之令六年庭無奸吏獄無繫囚士者農者各安其業於是瓚亦樂其治效賦公餘最樂一詩曰春行苗麥滿郊田好雨偏來六月邊羅雀縣庭公賦足喜占三白兆豐年官民相愛如家人遷桂林府同知臨發老幼遮道扳號皆不忍其去歷廣西副使

張岐鄱陽人進士弘治十六年任貴池知縣最愛民政有不利於邑者力去之或格于令甲必條請上官改而後已以才調華亭去歷官至廣東叅議

高公甲內江人進士弘治十六年任石埭知縣性高明處事果決邑訟以平遷去歷鎮遠知府祀名宦

向思敬沅陵人正德四年任貴池典史廉謹有為及致仕去士大夫多作詩歌送之

張宗智歷城人國學生正德十年任青陽主簿性廉介遇事敢為青民賴之遷膚施知縣去

謝瑞福建人國學生正德十二年任貴池知縣輯縣志修學宮及翠微書院凡有關文治者即勇為之

李渾慈谿人進士正德十四年任東流知縣值寧庶人兵後沿江驛騷尚無停役渾加意撫綏不事筆楚公私晏然既乃修縣志遷去歷太僕寺丞邑有遺愛碑

葉照慈谿人進士嘉靖三年任石埭知縣勅建預備倉

積穀以備凶歲甫暮以才調繁知新建尋擢御史歷鎮撫鄖陽右都御史

尤復號見齋晉江人舉人嘉靖四年任石埭知縣性嚴正每至學必進諸生講析經義開示甚多尋入覲里民例奉路費悉屏却之爲立碑紀其事

楊茂清鄞縣人官生嘉靖五年任貴池知縣善爲政政因土俗隨時宜察民間之所不便者除之其所便者舉之暮月間政化大洽至今懷之

祝增密雲衛人國學生嘉靖五年任青陽知縣素清慎積穀備荒得收放之法建九華王湛兩公祠遷刑部主

事去

余初字復之淳安人舉人嘉靖八年任東流知縣廉而明恩威並用值編審爲均里甲平徭役宿弊悉釐民被其德者爲立祠繪像以奉之

李廷輔蒼梧人舉人嘉靖八年任石埭知縣公勤清慎時以循吏推之

唐曜富順籍南昌人進士嘉靖十三年任石埭知縣有幹略政教並舉甫暮以才調繁知太湖歷永平知府練炫德興人舉人嘉靖十四年任石埭知縣性質直而剛斷倡議改建學宮於西郊甫即工卒邑人痛之

徐衍慶永新人舉人嘉靖十八年任貴池知縣性清介質實而不驚名時世宗奉興獻后梓宮返葬承天道經江上衍慶趣辦夫役奔趨日中致疾卒索無殮資池人悲號不輟祀名宦

茅坤號鹿門歸安人進士以經術文章名世嘉靖十九年任青陽知縣青俗素善訟坤錄上官所下訟牒悉條其誣妄狀上之得一切罷遣已乃按豪強奸黠者數人置重法民用帖然兩月以憂去

徐之麟都昌人舉人嘉靖二十年任石埭知縣以廉介日持剖斷明敏值前令練炫改建儒學未訖工之麟成

士林頌焉

陸芹餘姚人舉人嘉靖二十三年任東流知縣素清慎加意學宮興文作士以神山外向為更名拱北山立碣以為鎮秩未滿卒官祀名宦

黃瑩字默齋贛縣人舉人嘉靖二十三年任石埭知縣有惠政重輯縣志

徐可久馬平人舉人嘉靖二十八年任建德知縣以循良稱擢南刑部主事

鍾大賓字體嘉曲江人舉人嘉靖三十八年任東流知縣有長才時丈量田畝不爽尺寸定賦得均民德之為

立生祠於民化寺遷鞏昌府通判去

劉致江夏人舉人嘉靖四十年任銅陵知縣有惠政時景王就國道江上供億浩繁致與推官陳萬言經理夫役每裁抑之民以不擾未幾調知巫山銅民感之爲立祠與陳司李並祀焉

李得春號育亭鍾祥人以進士官禮科給事中嘉靖四十一年言事忤旨謫石埭知縣時值丈量田畝以平稱而尤作養士類遷知廣德州去民思之爲祠於仙壇宮歷官至僉事

四登年忠州人進士嘉靖四十三年任青陽知縣有幹略時勅築縣城登年令民照丁田自購磚石一月工具知堞巍然立四門啓閉至今賴之遷南大理寺評事

沈梅錢塘人舉人銅陵教諭嘉靖四十四年陞貴池知縣省供帳絕饋遺平賦役決滯獄刷庠序廉邑之豪強而勸法者稍芟薙之以循良稱

見茅鹿門集

曾謚樂安人舉人嘉靖四十五年任石埭知縣有廉幹埭向無城謚爲面勢勅築立五門工訖而民不苦役後被黜去埭人莫不惜之

徐儒號仰峯臨川人進士嘉靖四十五年任青陽知縣時儒年方少而練達老成以仁愛爲治嘗詣學宮進諸

生講經課藝月吉讀法亦如之以訟至者必訓諭之俾
感悔而去踰年赴部改選民立碑以識去思焉

沈子勉桐鄉人舉人隆慶二年任青陽知縣性儉約嘗
數日不肉食出門減騶從節冗費無算徵賦止用里催
以苧熟爲候它時勿及也俗好訟剖決曲直外必訓諭
再三使悔改而後止時青邑協濟大通李陽河二驛不
勝其煩子勉請增本邑夫廩而罷二驛協濟甚爲民便
踰年以憂去民立生祠以祀之

李子躍東平人舉人隆慶二年任石埭知縣性謹愨爲
政寬和遇旱步禱赤日中對槁苗號泣曰寧災令一年

絕我民粒未幾雨大注槁苗復生埭人爲建喜雨亭
以志之

羽金堂錢塘人進士隆慶二年任銅陵知縣有善政而
長於歌詩留題甚夥遷廉州府同知去

張篚號庾泉涪州人舉人隆慶二年任建德知縣有清
操賦完訟息閭里晏然上官以其才短去之邑人莫不
歎息有涕泣者

陳春字同字仁和人舉人萬曆初元任東流知縣勅造
邑城重修邑志凡興利除弊之舉皆勇爲之遷工部主
事去

葉明元同安人進士萬曆元年任石埭知縣善撫字爲民省浮費清滯獄請上官裁減差使以節夫馬而尤愛惜士子嘗割俸以周貧生遷南刑部主事民德之建生祠以寓去思焉

伍定相臨川人舉人萬曆四年任貴池知縣潔己愛民與太守王頤力行條鞭法并役馭會以免里甲供應解組歸講學臨汝山中年八十三卒

蘇萬民號淮楚江陵人舉人萬曆四年任青陽知縣莅官以嚴善緝盜賊境內無鼠竊者尤喜修建自廨學以及山川祠廟盡爲新之并重修縣志九華山志擢

御史去

徐金星字玉垣舉人鄞縣人萬曆四年任建德知縣甫至值歲凶發穀賑濟民賴以生月朔望謁夫子廟廷必進諸生講學課藝而折獄稱神明上官薦牘十一上擢南監察御史有生祠

劉鈐宜城人選貢萬曆七年任東流知縣善育民立社倉積穀以備賑清丈田畝以平稱於縣治闢衢五俱贅以石遷尋甸府通判去

熊蓋臣歸化籍金谿人舉人萬曆十一年任銅陵知縣以城東北二門未按形勢爲改立正向又塞小北門其

費皆給之官十四年修縣志擢刑部主事

孫成名慈谿人進士由庶吉士爲監察御史言事忤江陵謫合州判官萬曆十一年遷青陽知縣爲治明敏發奸摘伏吏不敢欺而尤喜獎拔士類遷禮部主事歷湖廣提學副使

常道立江夏人進士萬曆十五年任青陽知縣闢城東南隅一門名之曰通儒以便行者而作興學校尤力未幾調祁門歷吏部主事

蔡立身平陽人舉人萬曆二十年任青陽知縣建華東公館築青龍橋定九華供應修九華志遷高唐州知州去

陸階字五雲桐鄉人舉人萬曆二十一年任石埭知縣值旱虔禱日中雨立沛旣又革里甲供億諸費罪罰皆從其寬者卒於官貧不能斂埭人爲之經紀喪事設主仙壇宮祀之

熊應禋金谿人舉人萬曆二十七年任石埭知縣有惠政多舉廢墜修葺學解祀宇及重編縣志上官才之遷鄭州知州去

羅憲凱字元甫豐城人進士萬曆三十年任貴池知縣厲清操出政平易不爲鷙擊而人自憚之修復齊山書

院選齊山詩未竟而卒池人士哀之

傅賓諸暨人進士萬曆三十二年任青陽知縣為政得體要寬猛相濟民以大和重修縣志其既詳自序中王浙號懷楚灌縣人舉人萬曆三十七年任建德知縣以和惠莅民每事周詳緝密不苟焉而已也邑南堯城渡為江右孔道水漲時行者常病涉浙始砌石橋于水上人皆便之

徐一科字滄盈弋陽人舉人萬曆二十九年任銅陵知縣有廉幹四十一年大水銅仁豐三圩勢最下盡潰水中一科惻然曰發粟賑饑此一時之計非所以圖久遠也乃自百家墩至臘脂夾築都埂長八十餘里以周環各圩墩壩而以時疏濬埂內水道為洩蓄焉銅民德之名其埂曰徐公堤立祠勒石記其績尋擢去歷兩淮鹽運使

李如桂縉雲人舉人萬曆四十七年任青陽知縣樂易和平與民休息嘗協成青瑣橋青民即橋畔立祠祀之遷南京西城兵馬司指揮去

羅華袞字浮玉羅山人進士初知曲江以憂歸天啓三年補青陽知縣守介而政勤賦無羨餘訟不久滯使客過青者弗增馬額以為民擾未及暮以才調知武進青

民欲叩闕乞留不果及發爭號泣以送之并建生祠於郭內

張燦垣字紫城成都人進士天啓末任貴池知縣爲治精敏庭訊數十百人無不了了時徭輕役減境內晏然虎亦爲之他徙而尤重學校所器識人材甚當崇禎三年遷兵部武選司主事去歷官淮海道

崔律平度州人崇禎三年以貢任銅陵知縣有廉幹治馭法之吏不稍寬而以禮接士歷兩考遷六安州知州去殉流寇之難銅陵祀名宦

何應明字曙初晉江人舉人初爲舒城教諭崇禎五年德知縣加意興除精于釐剔豪健悉屏跡聽訟無其平各賦有羨耗即以充銷解之費不以私改建

不數月而辦以強項報罷臨發蕭然襤被而已許茂莘龍谿人歲貢崇禎五年任東流知縣善字民去煩苛之令以楚中有流寇增築城堦爲守禦計東民賴之謫官去後歷寧國府同知

田瑞龍字蒼霖固始人進士崇禎七年任貴池知縣重士興文以清勤泣事事無闕冗時流寇在江北瑞龍募丁壯四百人爲一營以資守禦池城特倚重焉中攝青陽青陽治方注上考以勞卒官

宛三奇號襟源黃梅人進士崇禎八年任建德知縣以平恕爲治人咸宜之丁憂去復挂吏議來池民皆奉壺飡以致戀後其事雪復官

王家柱字石卿江陵人進士崇禎十一年任青陽知縣有幹才政平訟理不務催科而民賦自辦十二年以才調知貴池連值水旱日講求荒政至解章服購米煮糜以食飢者又以江北寇警復修晉城堞訓士儲糧以爲備焉有以嘉禾瑞麥告者輒斥曰此何時也而以祥報乎以艱去兩邑皆懷之不置後張獻忠破荊州死難青陽人謂其媲美羅令並祠之

王化澄字登水金谿人進士崇禎十三年任青陽知縣爲治敏練首均馬改革陋規捐罰緩釐夙弊時軍需孔亟上官嚴檄催徵化澄于正供外悉汰羨餘勸民輸納上不誤餉下不累民而間乘公暇倡玉華大社集士會文以最報擢陝西道御史巡按廣東

葉幹字伯貞金華人舉人崇禎十四年任石埭知縣爲政不煩幾致刑措十六年楚帥左良玉以舟師東下江上騷然幹親率涇縣太平青陽石埭四縣鄉兵扼龍口以備不虞四縣賴之遷淮安府同知去今龍口尚存石關即幹扼守處也

李際明號樵懷順德人進士崇禎十四年任建德知縣性甘淡泊爲治寬平於法有所不可者不稍徇也嚴絕包苴凡贖鍰槩不入私橐時大饑區畫賑濟倍力民賴之以行取去

胡鯤化鹿邑人舉人崇禎十六年任銅陵知縣有幹略勇於爲民時沿江戒嚴過兵索餉鯤以身當之遂不敢縱及左夢庚兵水陸並至鯤化躬率民衆晝夜城守左兵不戢銅民與鬪殺其數百人夢庚怒破縣城殺城中男婦無算鯤化亦被害死

本朝蔣應仔山陰人選貢順治二年任銅陵知縣時被左兵之難百姓流亡城郭廨舍俱毀壞應仔補築雉堞復起堂皇并安集流散由是漸有復業者民至今德之

史編字覺萬滎陽人進士順治初任青陽知縣躬儉約泣事勤敏值丈量田畝編躬親其事以均平稱徵賦有定期不過急亦無敢後者歲饑煮糜徧賑復給麥種勸之每春秋進諸生課文藝青人勒石以頌語在鄭尚書三俊記中

陳益修濟寧人進士順治初任貴池知縣時寇亂初平益修以寬厚爲治甚得民望尤重文教建學宮文昌閣

行取主事去

蘇弘謨遼陽人貢士順治六年任東流知縣有強力善撫凋敝凡城垣廨舍學校倉廩皆其所修建而兵馬往來舊無驛遞皆出里甲供應民不勝其苦弘謨力請於操撫李公爲撥徽寧所轄六縣銀兩爲協濟之用復以餘銀買民田收其租以養馬及後設官驛始停協濟而馬田至今存焉又刑修縣志亦百年來未舉之事也以遷去至今猶思其澤云

陳秉化海州人順治六年任石埭知縣以慈惠稱陞隨州知州去民祠之

劉曰義遼陽人貢士順治七年任銅陵知縣時銅民初復瘡痍諸廢未舉曰義加築城垣視舊倍固學宮亦未竣工曰義復倡邑人建成之規制悉加其舊又修紫陽書院濬河道治街衢重輯縣志邑中煥然改觀焉以行取去

楊夢鯉字南叟莆田人進士順治十年任青陽知縣廉介而有爲革漕糧陋例重修學宮輯縣志青人立碑頌之

李愈昌鹽山人貢士順治十二年任貴池知縣善字民勤于政事嘗親行鄉村山谷間設柵備盜修學宮勸社

學重輯縣志池人稱之

李爲極字用之光州人貢士順治十一年任建德知縣有清操催科不擾以公事呈誤邑人相率詣臺使請留不得及去皆垂涕送之

侯之桓遼陽人舉人順治十四年任東流知縣值有鄰盜爲境內患漸次綏靖之革弊興利振刷一新又重葺學宮以育材爲已任東人至今祠之

高寅字唐又任丘人進士順治十七年任建德知縣清屯糧釐積弊重輯縣志先是學宮移西郊垂三十年矣厥地勿稱寅倡議復移建于城內西北隅舊學之址屬

規模有加於舊士人賴之未幾卒官
思芹永嘉人拔貢順治十七年任銅陵知縣有清操科不擾境內肅然制府以循良列薦銅民德之

岳申字式南沔縣人舉人康熙三年任貴池知縣年已將七十矣坐堂皇聽斷明決凡案牘皆手自裁定不稍稽畧時策一馬行郊原於坡塘圩堰處指示疏濬蓄洩之法皆得宜賦無耗羨悉貯外庫不絲毫自肥布衣糲食泊如也而興學育才月有課季有考聘入秋闈歸卒卒後擢兵部職方司主事哭吊者萬人而貧不能歸櫬即留葬齊山之陰松楸鬱然過者莫不瞻拜焉

姚子莊字六康歸善人有文名前明舉廣東鄉試第一
康熙五年任石埭知縣敏于政事首條錢糧六弊六法
行之次均里甲恤徭役而重葺學宮建陵陽書院及舉
義塾十二所延塾師以訓民間子弟焉他如道路橋梁
亦無不修舉者久任罷官去

張應薇閩中人舉人康熙七年任貴池知縣有惠政雙
鶴來集其庭因更其堂曰來鶴重葺通遠門城樓扞殷
家滙公館後辭任去

馬得禎介休人康熙二十一年任銅陵知縣性剛介明
於聽斷而於老穉尤加恤焉銅多圩曰每值水得禎輒
躬督隄防不辭勞瘁以是民深德之丁艱去相率攀送
多泣下者

趙衍號香沙東陽人進士康熙二十四年任貴池知縣
號敏練貴池向多積逋其弊由於總戶催科者莫得其
主衍為按戶清注俾實田辦實賦民深便之建縣廳事
造學宮文昌閣用形家言建水德亭於城東城內遂少
火患惜里吏議罷官

蕭璉山陰人康熙二十五年任銅陵知縣善剔蠹弊胥
吏不敢舞文而輕減賦羨民德之以疾卒官老幼皆為
之垂涕焉

池州府志卷第五十六

池州府志卷第五十七

中憲大夫知江南池州府事加六級襄平馬世永編纂

名宦傳四

宋周南字南仲平江人從葉適講頓悟之學文詞雅麗
精切以世道興廢爲己任登紹熙中進士第爲池教授
池守蔡必勝嘗命南董刻胡銓文集會南婦翁黃度以
言忤當路御史劾度僞學并及南罷之居齊山一月始
去

馬廷鸞字翔仲樂平人淳祐中調池州教授需次六年
寶祐元年召赴都堂審察辭至池以禮帥諸生

張夢錫端平四年教授池州傳經史能文章因材曲成有裨教化

元貢奎字仲章號雲林宣城人幼有智識度量尤以文學名家中進士第大德五年領池州路齊山書院長嘗吟咏山川風物其詩載集中及延祐至治間累官至集賢院學士卒贈尚書謚文靖所著有雲林橐倦遊集子師泰能濟美云

胡文虎延祐間池州路教授製池州路新建總管府記存志中

景祥至順三年為青陽教諭著雲松堂記

池州路教授先是學前有一池歲息悉為豪強引例罷免廷用不從得徵錢一萬七千貫有奇以之修葺學校時皆稱其強幹云

程端禮字敬叔鄞縣人有經術篤於踐履時學者皆宗象山端禮獨從史蒙卿傳朱子明體達用之旨至元間教諭建德增學舍以居生徒著讀書日程以為訓盡復學田之為民占者始田三百畝及受代增至一千畝又有稼軒者前賢遺蹟也久為人據悉按籍奪歸之遷衢州路儒學教授去邑祀名宦

徐觀字國寶玉山人至元中登進士第至正五年為銅

陵教諭有文有行爲時名師著尊賢堂記遷紹興學錄
歿祀銅陵名宦

朱升字允升新安人至正八年登江浙行省進士第二
名十年授池州路學正先是池州路學田甲他學後爲
官吏蠹食弟子員日僅一飯肄業者寥寥升至舉吳文
正公鼠牛之喻爲釐夙弊而整齊之江南北學者雲集
晨興講授以身示法焉十二年秩滿去十八年明太祖
下徽州間升名召問策對曰高築牆廣積糧緩稱王太
祖悅命預帷幄密議

潘著字澤民嘉興人至正間爲銅陵教諭時銅陵學校
久廢不治著至則葺舍宇築牆垣拓彌高亭延碩儒爲
師以教之

王汝爲臨川人洪武間任府學教授善教士其訓課
無間寒暑士多爲所成就焉祀名宦

陳實福建人優于學識洪武中任石埭教諭以善教聞
烏祥武進人洪武中任府學教授律已端誨人不倦一
時門弟子多所造就焉

支立嘉興人洪武間任府學訓導素博洽勤于教士遷
翰林院孔目歿祀名宦

陸正高密人洪武中爲府學教授誠于率人講訓不倦

卒於官縉紳咸悼惜之

項伯賢

按嚴州志作項伯英

浙建德人由太學生中洪武三十二

年應天鄉試授建德縣教諭律已端嚴善於施教遴選中文學之有志行者得九人造就之鄭景曜柯暹其最也擢工科給事中祀名宦

夏遵道號尖山貴池人洪武間以儒士薦為本府教授其事詳儒林傳中

洪仲遵號丹崖建德人洪武間以薦為本縣訓導其事詳儒林傳中

方誠

按傳作方軼字叔誠號止菴而府縣志俱作方誠豈省文耶

青陽人洪武間以

薦為本縣教諭其事詳儒林傳中

李鼎沅陵人永樂二十三年以舉人任貴池教諭制行高潔因材曲成首置學田以資贍給學者勸焉後卒官遂家于池祀名宦

傅宗字本原浙建德人以舉人宣德間任貴池訓導教人為學以身先之遷國子監助教擢檢討歷少詹事出為四川左叅議

王貫松陽人父景為翰林學士貫博學舉于鄉正統初任銅陵教諭勤於誨人嘗拓學宮為士林所重因奉母喪葬銅陵遂占籍焉祀名宦

紀輔閩縣人以舉人正統間任府學訓導素績學立行誼訓士能勤多所造就所著有自怡集祀府祠

黎擴字大量臨川人正統間以儒士任府學訓導性淳謹工詩文陞蘇州府學教授所著有學鳴集

陳恭侯官人最博學正統間以舉人任建德教諭善以學問誘人邑中文風從此日盛焉後家于建

余珏鄱陽人天順元年以舉人任貴池教諭教人以敦本實學見有以藻麗自衒者必痛斥之

而兩仕池郡疑有誤

按府志又列珏于教授豈一人

林橙莆田人天順中任府學教授為學尚樸誠不喜豪

俠訓人先器識辭章非所尚也省試屢聘校閱號知文

陳榮泰和人天順六年任府學教授謹矩矱嚴條教學者敬之

章璘鄞縣人天順間以舉人任石埭訓導立訓有方為諸生所矜式焉

強千之南海人天順間任建德訓導素工詩文善於立教縉紳稱之

方莫字昌言歸安人通經術敦行誼成化中以舉人任建德教諭言詞貴池兩邑俱善於立教規條整肅學者遵

之遷翰林院孔目擢檢討所著存昭明西廟碑文

鍾炫字世光上虞人成化十一年以舉人署石埭教諭
正已率人諸生自相勸爲學當時化之祀名宦

杜巽巴縣人學術醇正成化中以舉人署東流教諭敷
教有方學者多賴以成其業焉祀名宦

章唐黃巖人性醇粹有行有文成化中以鄉舉授東流
訓導請業至者輒不吝誨之士風爲之一變焉祀名宦

魏朝 亦姚人有學行弘治六年以舉人署建德教諭

建 何業堂集諸生講肄其內雖嚴寒盛暑亦不暫輟正
德初遷知縣行取時劉瑾用事以朝端爲謝遷鄉人遂

外補邑祀名宦

謝復莆田人弘治十年以鄉舉署石埭教諭善誨人時

文風爲之一振焉

孟懋弘治十三年任貴池教諭善教士因才曲成無
棄者先是學宮在縣治之東地僻陋不稱孟懋與知

縣曹瓊倡議遷於郡治西黃觀宅故址面勢得宜士風
爲之一振時稱其不愧師表云祀名宦

方震浮梁人洪治中以舉人任建德訓導以善教稱遷
合浦知縣

錢錄東莞人弘治十七年以舉人署石埭教諭其爲教
也先德行而後文藝其時士習翕然歸于純正焉祀名

宦

陳曰漸莆田人有品行明于經學正德五年以舉人署貴池教諭善誨人以母老歸養

蕭倫萬安人幼從遊于陳白沙之門制行不苟正德七年以貢任建德訓導構一菜軒於宅左起止其內非正論不以訓諸生也任五載辭去

李淮貴州籍合肥人正德八年以舉人署建德教諭勤於其職嘗闢地以拓學宮郡守何紹正知其才令攝縣事數月以治聞

廖皞臨桂人正德間以舉人署東流教諭文行足以式士十二年成進士入翰林當時榮之

謝明番禺人有文行正德中以舉人署東流教諭教士勤懇輯縣志當道重之應四川聘校鄉試以得士稱陞上杭知縣去諸生莫不涕泣送之者祀名宦

周良會清江人素博學砥礪名節正德十三年以舉人署貴池教諭與貴池令謝瑞教授林溥同輯縣志分地與官制人物文翰四門而爲之後序焉諸生之雋上而貧不能供膏火者良會輒給之遷廬江知縣歷長沙府通判

曹綸咸寧人優于文學正德十三年任青陽教諭動循

規矩訓士以勤與青陽令包廣訓導溫玉同修縣志而
綸為之序焉

陳鍾侯官人嘉靖十四年以舉人署青陽教諭學行俱
有程法與人交一無所苟給廩餼先貧生亦嘗割己俸
以助最困者甫十月卒官諸生相向哭失聲厚賻以歸
其櫬焉

劉昉字伯象號白石安福人嘉靖中以貢任青陽教諭
自立課程肄誦經史不少休諸生有過失者籍記之期
其悔改而後止會大饑青令張牧以賑事屬昉昉徧歷
各鄉酌貧富使出粟以為賑豪猾不得與焉饑者全活
無算

蔣雷卿號太湖長興人博學善屬文嘉靖二十四年以
歲貢任青陽教諭端介清謹即束脯亦不輕受遷荊州
府學教授去祖餞數十里

沈梅號近溪錢塘人嘉靖四十一年以舉人署銅陵教
諭日下帷師諸弟子讎六籍及百家言直指檄校文他
省固辭遷貴池知縣

史鑰象山人嘉靖中以諸生任東流訓導博學敦行勤
於造士卒官諸生為之服心喪焉祀名宦

杜時騰上海人萬曆十一年以舉人署石埭教諭學博

而行潔開誠訓諸生貧者濟之諸生每樂親其教如坐
春風中也遷黃縣知縣去埭士皆思慕之

徐大用丹徒人萬曆二十六年以舉人署青陽教諭清
謹自持造士有法尋成進士授南工部主事考選南吏
部主事

湯有光上元人萬曆中以舉人署東流教諭善造士聘
校鄉試出其門者皆一時名雋之士人豔稱之遷去歷
瑞州知府

周謙蕪湖人萬曆中任建德訓導置奠龍山田及禪師
菴山木爲學田給貧生至今賴之

周道隆嘉定人萬曆四十二年以舉人署銅陵教諭和
易近人爲教不倦諸生之貧乏者却其贄且給以學租
時尊經閣未訖工道隆爲力成之諸生立碑紀其事擢
去歷官至刑部郎中

顧巒上元人萬曆間任貴池訓導性恬淡文雅絕俗飲
人以和遷於潛教諭不就歸

徐鳴臯太倉人萬曆四十七年以舉人署青陽教諭善
課士時青陽有蛟起五溪壞邑屋及學宮鳴臯與邑令
李如桂重建成之後遷南國子監學正諸生爲立祠于
文昌祠側與李令並祀焉

董應揚武進人治禮記掇經魁萬曆四十七年署銅陵教諭立教悉遵蘇湖遺範下帷於尊經閣與諸生課藝談經無間寒暑著有禮記衷說大全二書以授之聘校四川鄉闈所羅皆名雋擢去歷官至廣西叅政銅士勒有去思碑

黃三尚字念吾蕭山人萬曆末以舉人署建德教諭性嚴重程士以禮其貧乏者周之而慎惜獎許邑中有節孝非真而濫請旌額辱之不少貸遷去歷平度州知州過周屏江西人崇禎初以舉人署貴池教諭動履皆有法度嘗言儒者必以經術為先學校興舉然後可以治

識者韙之

陸上海人崇禎七年以舉人署銅陵教諭有才識撰著以馬寨磯地脈有關通學為築埂以固之遷巴東知縣

潘洪度號玄同海門人崇禎中任建德教諭性寬和而嚴于義利與諸生論文終夜忘倦其有不率教者夏楚隨之不貫也

曾世良字房仲泰和人崇禎中任貴池訓導工文章教人以敦本力行學者宗之所著有閒園詩

田文定州人崇禎十二年任銅陵訓導性質樸接人謙

和諸生樂就其教陞益都教諭

張駿業句容人崇禎十三年以貢任銅陵教諭以端方率士嘗捐俸建櫺星門及圍牆

楊志仁字依之六安人有文名崇禎中任建德訓導與諸生講業不怠諸生最親愛之遷大足知縣

沈天寵蕪湖人崇禎中任府學訓導訓人立品勵行諄諄不倦署教授五年化被多士雖自奉首着而遇諸生有急必周之十六年遷知縣去諸生立碑頌之

張緯安東人崇禎十六年任銅陵訓導有雅度飲人以和左兵破銅陵及于難

賈棫崇禎十七年任東流教諭同于國顯東流訓導嘗死楚兵之難

本朝胡虞支歙縣人素博洽工詩文明崇禎末任貴池訓導以真率示人人亦喜其無城府入本朝即遷本

縣教諭諸生安之凡名勝多留題咏焉

馬之光字實孚六安人順治初以舉人署貴池教諭性豪邁能周恤貧士其有文行者尤器重之陞知縣

彭文煒江寧人順治七年以舉人署銅陵教諭時遭兵燹後學宮雖草創尚未竣工文煒次第葺成之又多購

經書貯學舍時集諸生爲之講肄由是諸生知嚮學焉

所著有易學大成春秋提要聖道真統等書

甯光璽字玉臣大興人順治八年以舉人署建德教諭時承兵燹後諸生嚮學者少光璽爲作興鼓舞之而時賙其困乏于是文風漸啓焉十二年成進士去官建士爲立去思碑於學

李士蛟鳳陽人順治九年任銅陵訓導與教諭彭文煒同葺學宮而勤於課士寒暑不輟諸生頌之

吳貞度宜興人進士改庶吉士順治十三年謫府學教授克舉其職不以遷謫自居著文課士油然自得也尋遷去

陳天策字銘以宜興人順治末任貴池教諭年已老矣讀書不輟與諸生講論無倦容及歸猶手抄自所著詩文寄池士人皆念之

劉堯枝字根生宣城人順治十七年以舉人署建德教諭長于文史善訓諸生康熙元年建令高寅遷學宮於城內堯枝與訓導謝晉共襄事焉三年遷清遠知縣

周體元字善長山陽人康熙七年任石埭訓導有才幹喜振刷八年佐埭令姚子莊葺學宮九年請頒學篆當事嘉之

宗觀字鶴問江都人素風雅以詩古文名康熙二十年

任貴池訓導每與諸生論文校藝而遊覽名勝輒留題
咏焉遷常熟教諭

池州府志卷第五十七

池州府志卷第五十八

中憲大夫知江南池州府事加六級襄平馬世永編纂

漢嚴詡唐費冠卿傳第一

漢嚴詡陵陽人

今石埭

哀帝時以孝行為官歷潁川太守

謂掾史為師友有過輒閉閣自責終不大言郡中亂王
莽遣使徵詡官屬數百人為設祖道詡據地哭掾史曰
明府吉徵不宜若此詡曰吾哀潁川士身豈有憂哉我
以柔弱徵必選剛猛代代到將有僵仆者故相弔耳詡

至拜為美俗使者

見漢書何並傳吳非輯入池事未盡錄

唐費冠卿字子軍青陽人以鄉貢進士久居京師有感

懷詩曰勞獨不爲苦求名始辛酸上國無交親請謁多
少難九月風到面羞汗成冰片求名俟公道名與公道
遠力盡得一名他喜我且輕家書十年絕歸去知誰榮
馬嘶渭橋柳特地起愁聲登元和二年進士第聞母病
馳歸而母卒已葬矣遂廬墓側三年哭不輟聲且歎曰
干祿養親耳得祿而親喪何以祿爲遂隱九華山不出
長慶二年殿院李仁修舉其孝節拜右拾遺制曰前進
士費冠卿嘗預計偕以文中第祿不及于榮養恨每積
于永懷遂乃屏身丘園絕跡仕進守其至性十有五年
峻節無同清飈自遠夫旌孝行舉逸人所以厚風俗而
彰名教也宜承高獎以儆薄夫擢參近侍之榮載佇移
忠之效冠卿竟不應命賦詩曰君親同是先王道何如
骨肉一處老也知臣子合佐時自古榮華誰可保又曰
拾遺帝側知難得官緊才微恐不勝好是中朝絕親友
九華山下詔來徵又曰三千里外一微臣二十年來任
連身今日忽蒙天子詔自慙驚動國中人時人因名其
所隱之山曰少微峯使者焚香宣詔處曰天香嶺朝士
蕭建姚合輩往往作詩以寄之又有崔中丞者亦與冠
卿遊有酬崔中丞見惠詩俱寓高致卒葬雞母山詩一
卷今存十一首散見志中

池州府志卷第五十八

池州府志卷第五十九

中憲大夫知江南池州府事加六級襄平馬世永編纂

唐左難當傳第二

附桂盛 宋胡仲先 鄭舜臣
元陶起祖 明錢清 曹信

柯德禮 桂一季
陳賢甫 金宣一

唐左難當字匡正本涇人今析石埭七歲通經傳大義長好兵方隋末江東諸州郡為李子通杜伏威轉相攻據羣盜起乘之山谷大亂難當乃即所居陵陽山前築城兩重自為保障且遙與歙人汪華相犄角以拒羣盜州人倚重之武德三年杜伏威歸唐置宣州總管府難當乃盡籍其地納款於朝為置猷州隸宣州總管府即

以難當爲猷州刺史宣州大都督封戴國公食邑三千戶貞觀十三年三月卒賜葬其鄉之松子嶺今爲太平縣地子三人紹齊參宣州軍事貞觀十四年從征遼有功晉都督襲戴國公傳子仲明則玉垂拱三年宣州奏左氏墓有紫氣削仲明爵國除次紹芳次紹本居石埭桂盛字伯茂石埭人僖宗光啓間黃巢陷宣池逼七里七里有一溪溪東道坦易於馳突盛乃創改道于溪西與里人據險禦之遂名其地曰七里礮礪路盛官至舍人

宋胡仲先字國政貴池人有幹略閭里倚重之寧宗時

范提舉江東奏以仲先充民兵統領仲先移文諸將首領什伍其民而教之端平間邊淮告急歲再饑仲先力禦寇且傾私橐以賑給饑者一時全活甚衆後歸里卒

鄭舜臣建德人素任俠好義紹定中江西多寇亂提舉趙范聞其才牒充民兵副統領官使防淮南董糧餉常輸家財佐軍食朝命褒之後卒于里

元陶起祖銅陵人幼爲吏給事縣庭至正間徐壽輝據蘄黃趙普勝羅友賢輩起應之池各縣所在皆寇起祖聚義兵保障鄉里聞之朝授廬江知縣判銅陵縣事遷

同知池州路爲趙普勝所執死之

明錢清字公清青陽人幼倜儻好義尤精術數元末羣盜起趙普勝屢逼青陽爲陳友諒策應立砦于九華之濠谷巖最久清亦集其里人立砦于九華之六泉口以自保護乘賊間耕稼以爲食里人以是不饑至正十八年六月明太祖命常遇春討陳友諒遇春遣趙德劬以再興及院判趙忠略石埭青陽清乃率衆來附授指揮使吳元年從討張士誠平江歿于陣

曹信字信玉貴池人少負英氣果敢有爲元末羣盜起信同弟文玉起兵護鄉里明常遇春克池州信偕文玉

來附命即率所部隸遇春以功授衛鎮撫從太祖親征陳友諒戰死鄱陽湖贈含山男弟文玉以字行有勇略從大將軍徐達北伐守萊州授龍江衛指揮使世襲柯德禮貴池人元末羣盜起德禮集民兵護鄉里與錢清聲勢相倚重山寇多避之明常遇春克池州德禮來附命即率所部隸遇春以功授高郵右所百戶卒子永淳襲永樂中從英國公張輔征交趾戰歿子榮畧其戶歸詔優卹之

桂一季石埭人元末羣盜起石埭陷陳友諒一季集民兵于所居七里與之抗及明常遇春遣劉謙收石埭一

池州府志卷五十九
季率鄉兵爲導戰歿于陣贈衝銳舍人永樂中祀于社
正統十年加贈將軍至今廟食不絕

陳賢甫貴池人元末羣盜起賢甫集鄉兵爲自禦計與
趙普勝羅友賢輩相拒數年至正十八年冬明常遇春
下青陽石埭將臨州城賢甫即率衆歸附一州賴以獲

全

金宣一建德人元末羣盜起宣一集鄉兵保禦鄉里至
正二十二年羅友賢降于明帥朱文輝而復叛道遇宣
一宣一歷數其逆節友賢怒刃之宣一頭已落其馬負
其屍歸至鐵帽山始仆即葬其地焉